


[www.BibleForChildren.org](http://www.BibleForChildren.org)


# Matius 26



Teran amar  
inean ewal, beti  
tamata Yahudi ra  
rotu snoba na'a rira  
amar dawan Paskah.  
Na'ut inyai, na Yesus nti  
ahu Betania. Lazarus i Yesus  
nfava'at ewal roak ia tali  
matmatan yai,  
ntali ahu yai.



Wol mnanat  
obin, na Maria  
ntaha ngul i voan  
lolin urun a naran  
narwastu, na'a botal  
fruan, ma nli'i na'a Yesus  
ean a, beti nala ni vut a ma  
al na'i. Ba ngul i voan lolin  
yai, voan a nsoru lahir  
rahan yai. Ngul yai fyawan  
urun.



Tamata isa tali Yesus Ni tamata vutu rahin irua ovi rorang Ia, naran Yudas Iskariot. Ia ti ntuan Yahudi rira dawan mela falurut ra, boma nfredi Yesus verin ira. Rarenar afa i Yudas nfalak yai, na inar urun, ba rtorung ma veka rala kubang verin ia. Ba ndava amar kena mane nfredi Yesus.




Ba ira rotu wean i nfalak yai, ma rasusan afamtahan ma al rotu rira snoba Paskah. Yesus ovu Ni tamata ra rafna'an obin, na la nala roti a ma nfalak fara weninyai verin Ubu, beti nvisul roti yai ma nsiduk verin ira. Ia nfalak ne, "Myala ma mian kikyai. Ini Ya'a tenang a."



Nata Yesus nala vali kobi i nsa'a  
anggur ma nfalak fara weninyai  
verin Ubu, beti nala ma renu.

Ia nfalak ne, "Mia munuk myenu  
anggur i na'a kobi ini, tevek ini Ya'a  
larang i nvoat al nakvanak tamata  
rivun rira salasilan ra, ma neluk  
faneak ne, Ubu nfakena  
roak Ni tnorung a."



Nata Yesus nyalak verin Simon Petrus ne, "Simon, Simon, eka mrenar ma lolin! Ubu ntorung roak ma nitdawan veka nlabir teman mia. Ia veka nwi-nwa mia, ma wean lahir gandum ovi tamata ra rtafi. Na'uk uflurut roak verin oa ma fara mu inorang a na'a lalawatan Ya'a. Wean i mahil roak ma morang Ya'a, na fwangrebat vali teram a valim tamata inorang ra ma rira inorang a nana'a lalawatan Ya'a."




Petrus nyalak ne, "Duila'a, ya'a utorung roak ma wean i ra'abu'i te rfehan Oa, na ya'a veka ovu vali ma una'a bu'i ralan te umata ovu Oa!" Yesus nyalak ne, "Petrus, ufalak verin oa ma mka'a ne, ovan ini lahir manut wol nkukuwai obin, na oa malak nala fatelu roak ne, wol mka'a Ya'a."




Yesus oву Ni tamata ovi  
rorang la rbana ma raran  
va'i isa naran Getsemani.  
la nfalak verin ira ne,  
"Mdyoku ini veki, ma ti  
uflurut na'a ineri." la nfalak  
ne, "Bapa, o Bapa! Oa  
mot-nala akataka munuk, ba  
fara fwaroa susa i dawan  
urun ini tali Ya'a. Na'uk  
deka wean i ralang nfalak a,  
ba wean watan i ralam  
nfalak a."



Ba Yudas nti wan yai. Ia novun Roma rira sidovung  
suldadu isa, ovu tamata ovi rwanar Yahudi rira Rahan  
Dawan Falurut a rti vali wan yai, ovu rtaha damar,  
faduk ovu rira mneran ra. Tamata Yahudi rira  
dawan mela falurut ra ovu tamata Yahudi ovi  
rtali sidovung Farisi rsinir ira ma rti.  
Tamata isa tali Yesus Ni tamata  
ovi rorang Ia, nala nahin  
blawat ma nafat vatuk lahir  
Yahudi rira Mela Falurut Ila'a  
ni tamata sansinir isa arun mela  
a. Na'uk Yesus nfalak ne,  
"Mtalik kikyai!" Nata Yesus  
nkena tamata yai arun ma notu  
ma lolin ewal ia.




Ira rtaha roak Yesus, beti rovun Ia rti Yahudi rira Mela Falurut Ila'a ni rahan a. Petrus nban-orang vali tali raroa watan. Na'a rahan yai ni lean a fruan a, na tamata ra rsidovuk yafu ma rdok-lilit yafu yai. Petrus ti ndoku vali ovu ira.



Simon Petrus nalak ia ma  
nfalak ne, "Wahal."

Ba Mela Falurut Ila'a  
ni tamata sansinir i lan  
a Petrus nafat vatuk  
arun a, ni tiniman isa  
nfalak ne, "Inlangin a,  
urea roak oa mimunuk Yesus  
mnya'a va'i yai." Petrus nalak  
ewal ia ma nfalak ne, "Wahal."  
Na'ut inyai, na manut isa  
nkukuwai lahir. Ba Petrus nbana  
nti murin ma nvakar  
ma na'a samsekur.




Nata tamata ovi rovu munuk  
sidovung dawan yai, rdiri munuk  
lahir ma rovon Yesus nti verin  
Pilatus. Ba Pilatus norat la ne,  
"Yahudi rira raja verin Oa?" Yesus  
nfalak ne, "Oa ka'i  
fwalak roak yai."



Pilatus inan ma nfatalik  
Yesus, ba nangrihi fasa  
ewal verin tamata rivun

avyai ovu vain dawan. Na'uk  
rafwak ma rfalak ne, "Bwaku la


na'a aa walwalur! Bwaku la  
na'a aa walwalur!"




Ba Pilatus nala Yesus verin ira, ma ti rbaku la na'a aa walwalur. Ba rala Yesus ma rovun la rti. Yesus ka'i nvara Ni aa walwalur a, ma nti wan i naran Kalkulun Wan. Na'a vai Ibrani rfanara ia ne, Golgota.



Na'a wan yai, na rbaku la na'a aa  
walwalur. Ira rbaku vali tamata irua ovu  
la, ma isa na'a Ni lihir mela,  
na isa na'a Ni lihir balit,  
na Yesus na'a  
fruarira ra.



Maloli dawan amafal i naklo'i Yahudi rira Rahan Dawan Falurut ralan namadir lahir na'ut irua. Nata Yesus nafwak ovu vain dawan ne, "Bapa, ala munuk Ning vava'at a ma ufadoku na'a limam ralan a." Ti ma nfallak munuk wean inyai, na nan a nakbosal vali.



Ya'i laflofan roak, na tamata isa naran  
Yusuf ntali ahu Arimatea nma  
mane ntuan Pilatus. Yusuf ini  
ndoku Yahudi rira sidovung  
dawan, oву tamata ra  
ralang ma dawan ia.



Yusuf nanaban vali ma Ubu nfareta  
tamata ra wean lahir Raja.

Ba Yusuf nfabrahi tenan  
ma ti ntuan Pilatus ma  
nera Yesus tenan a. Ba  
Yusuf nfaha maloli  
ngangiar isa ma ti  
nfasuka Yesus  
tenan tali aa

walwalur, ma nkuma  
la ovu maloli yai.  
Nata Yusuf ti ma  
nfanuba Yesus tenan  
a na'a vatu i rtivan  
roak ia ma wean van,  
beti nlawar vatu  
dawan al nulang teri  
van ngoran yai.



Ni ilyan a, na'a amar i Yahudi ra ryari  
ira, na Yahudi rira dawan mela  
falurut ra ovu tamata  
Farisi ra, irmunuk rti ma  
rtuan Pilatus.




Ira rfalak verin Pilatus ne, "Baba,  
ami amangnanang na'ut  
i tamata siklabir eri nva'at  
obin, na nfalak roak ne,  
'Ti ma amar itelu  
nelak, na veka  
uva'at ewal.'



Ba rati van yai ma rfadoku faneak  
na'a vatu i nteri van ngoran a,  
boma wean i tamata ra  
rlabir van yai, na rka'a.  
Rotu munuk wean inyai,  
beti rfalak ma  
suldadu avyai  
rwanar ma lolin  
van yai.




Amar i Yahudi ra ryari ira yai nelak  
roak, na Maria Magdalena ovu  
Maria liak isa vali rti ma rsi'ik  
van matmatan i rfanuba  
Yesus tenan a. Na'ut  
inyai, na lera sarseri  
mane ndata roak  
na'a amar kareda.



Ruru dawan urun na'a inyai, tevek  
Duila'a Ni sansinir isa ntali lanit  
ratan nsuta ma nlawar vatu i  
nteri van ngoran yai,  
ma ndoku vatu  
yai ratan a.


Suldadu ovi rwanar  
van yai rbobar ma  
raruru lalean ira, ba  
rleka rsuta fun ma  
wean tamata ovi  
rmata roak.




Na'uk sansinir yai n falak verin vata  
avyai ne, "Deka byobar, tevek  
uka'a roak ne, mya ma  
mdyava Yesus i rbaku  
roak la na'a aa walwalur  
a. la wol nleal roak ini.  
la nva'at ewal roak,  
wean i n falak lan  
roak verin mia.

Eka mya

ma msyi'ik wan i  
rfanuba la na'a."




Vata irua yai rafla talik van matmatan yai. Ira  
rbobar urun, na'uk ralarira lolin urun i vali,  
ba rfarlan mane ti rfamalik afa ini  
verin Yesus Ni tamata ovi rorang  
la. Brian munuk, na Yesus ntuan  
ira ma nfalak ne, "Oo Titi averi!"  
Ba vata irua yai rfaseri la, ma  
rsangatur ovu rangabuk ean



a ma rfadawang la.





---

Nata Yesus ti nfavotuk vali tenan verin Ni tamata vutu rahin isa ovi rorang Ia, na'ut i rafna'an. Yesus ntabu ira, tevek rira inorang wol nangrebat ovu vali rafena lahir ma rorang tamata ovi rarea Ia ma rfamalik ne, Yesus nva'at ewal roak. Ti ma Duila'a Yesus nangrihi munuk verin ira, na Ubu notu ma nrata lanit ratan, ma ndoku Ni lahir mela a.



Ubu Ni silobang dawan urun verin  
tamata ra na'a lanit ivavan a, ma  
nala lahir Yanan ikisa lalo'i a, boma  
tamata iki watan norang la, na  
veka wol nmata kakiwal, na'uk  
veka nva'at, nata ti  
wol ni wahan.



Roma 3:23 Ubu inan ma tamata ra munuk rovu la na'a vanan i nfitik nyadat. Na'uk tamata ra munuk lahir na'a lanit ivavan a rotu roak salasilan, bi notu ma rfaroa lahir ira tali vanan i nfitik nyadat a.

Roma 6:23 Tamata ovi rotu salasilan ra veka rira matmatan kakiwal. Na'uk Ubu nala vava'at kakiwal verin tamata ovi rira vava'at isa roak ovu dida Duila'a Kristus Yesus. Ia notu wean inyai wol ntali afa ovi totu ra, na'uk la ka'i nala watan.

Ibrani 9:27 Ubu nfadoku roak ma tamata ra rmata fasa watan, beti ti rdiri Ubu wahan ralan a ma nfaleka inukun verin ira.



Efesus 2:8,9 Ubu nala Ni rala lolin a verin mia, ba notu linga'an ma nsikat mia tali bira salasilan ra, ma bira vava'at kakiwal, tevek myorang Yesus. Inyai wol ntali afa lolin ovi myotu ra, na'uk Ubu ka'i nala watan verin mia. Ubu notu afa yai wol ntali afa lolin ovi myotu ra, ba deka tamata isa vali nfakaratat tenan a, ma nfikir ne, afa ovi notu ra not-nala ma Ubu nsikat ia tali ni salasilan ra, ma ni vava'at kakiwal.

Roma 10:9,10 Ba wean i mtyorong ma fyalak na'a tamata waharira ralan ra ne, "Yesus Duila'a la," ovu myorang na'a ralabira ra ne, Ubu nfava'at ewal roak la tali matmatan, na Ubu veka nsikat mia tali bira salasilan ra, ma bira vava'at kakiwal. Tevek ita torang ovu raladida ra, bi Ubu notu ma dida vava'at ra rmalola, ovu tatorung vali la ovu sumardida ra, bi Ubu nsikat ita tali dida salasilan ra, ma dida vava'at kakiwal.



Yohanes 3:16,17 Ubu Ni silobang dawan urun verin tamata ra na'a lanit ivavan a, ma nala lahir Yanan ikisa lalo'i a, boma tamata iki watan norang la, na veka wol nmata kakiwal, na'uk veka nva'at, nata ti wol ni wahan. Ubu wol nsinir Yanan nma lanit ivavan a ma nfaleka inukun verin tamata ra, na'uk nsinir la nma ma nsikat tamata ra tali rira salasilan ra, boma rira vava'at kakiwal.

1 Yohanes 5:11-13 Ubu Ni Ivar yai wean ini: la nala roak vava'at kakiwal verin ita. Vava'at kakiwal yai ntali a'uk Yanan a. Tamata ovi Ubu Yanan a nleal ralarira ra, rira vava'at kakiwal, na'uk tamata ovi Yanan a wol nleal ralarira ra, wol rira vava'at kakiwal. Utulis surat ini verin mia, tamata ovi myorang Ubu Yanan a, boma mkya'a lahir ne, bira vava'at kakiwal roak.



Matius 26-28; Lukas 22-24; Yohanes 13-21

Storyline by: Edward D. Hughes

Illustrated by: Janie Forest  
and Alastair Paterson

Adapted by: Lyn Doerksen

Fordata Bible (frd) © 2016, Yayasan Pemberdayaan  
Masyarakat Desa in cooperation with Wycliffe Bible  
Translators, Inc.

<https://www.bible.com/bible/2178/MAT.1.FRD>

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

